

痛史

第二
玉
二十
册
函

啟禎記聞錄卷五

去歲甲申之變。流寇驟入燕京。致先帝身殉宗社。國破家亡。臣民罹禍。慘毒不可勝言。乃寇盜終非大器。始雖僞爲寬厚。卒至搜括屠戮。無能撫定中原。未幾。北朝興師討罪。寇莫能寇。遁往陝西。口主遂入燕都。北直、山東、河南、山、陝、川、蜀等處。皆爲所有。建國號大清。改元順治。官位多仍大明之舊。

甲申五月。南中諸臣擁戴福王。立之於留都。欲如晉宋立國江左。亦可綿祖宗血食於不墜。奈嗜酒貪淫。殊非憂勤屬情之主。又寵任閣臣馬士英。黷貨擅權。穢濁仕路。朝鮮正人。僅一史可法身兼內閣兵部之任。惜但督師在外。乏同心共濟者。將傾之大廈。豈一木能支。用是心獨苦而志未伸。高、劉、鄭、左諸鎮。擁兵跋扈。史閣部疑有脫誤此曲說也。用計除高傑。乃其兵卒尙多。所過肆掠。乙酉之春。江北瓜、揚、通。

泰。俱被高兵擾害。長江不通舟楫。未幾。北兵大舉。南來維揚。因史閣部拒守。被攻城破。合城受屠。渡江直指南都。先聲所至。人心震攝。不待血刃。開門延入矣。

乙酉五月十一日。始聞北兵入南京。確耗。宏光遁走被執。馬士英逃亡。豫王已撫定南京。知大兵將及我蘇。吳城士民驚懼。紛紛挈家竄徙。是日舊撫臺張鳳翔、新撫臺霍達、按院周師盛、將幕時。俱於南馬頭舟中會晤。舊撫臺及按臺俱於是夕遁去。新撫臺停駐舟中。不登岸。六門徹夜不關。任避兵者入出。恐一禁閉。則人愈張惶。或生於內變之故也。

十二日。遷下鄉者愈多。每轎一肩。索銀一二兩。少亦索錢一二千。小舟一隻。索銀數兩。或索錢十餘千。得者以爲幸。不吝重價也。至十四日。霍院將搶奪亂民四人斬於泊舟水次。十七日。又將鄉間亂民一人梟斬。郡守日夕惶惶。漸聞豫王差官取鎮江常州冊籍。次第將及蘇郡。地方官長漫無主持。鄉紳但知潛避。無一倡義守禦者。小民無所倚恃。咸思投順。以苟全性命。

二十二日向有吳江舉人潘爾彪遷居郡中。薦一方術兼業醫者曰李滴春於官。謂能行兵。欲以爲將。擬翌日登壇受鉞。羣心大駭。慮李非有才略足恃。輕舉挑釁。難免揚州覆轍。遂率衆擊毀潘李二家。太尊陳師泰卽硃示撤兵。以安衆心。二十五日。南京差來安撫鴻臚寺卿黃家鼐、通判周荃、參將吳某、先至虎邱。移文坐管游擊府。知會迎接。索取蘇州府冊籍。陳太尊卽於是夜避去。二十六日。奉府各廳衙役及武弁等。備儀從。執香迎接。撫入坐府堂。告示張掛府前。稱大清國順治二年。奉欽命定國大將軍豫王令旨。大意謂順從者秋毫無犯。抗逆者維揚爲例。錢牧齋另有印記告示。詔諭慰安。是晚。長洲縣知縣李碩亦棄官去。安撫仍回寓虎邱。二十七日。復迎入城。坐兵道中。冊籍已獻。武弁士民接踵進見。人以爲大事已定矣。忽二十九日清晨。有常鎮監軍楊文驄、與都司朱國臣共謀令營兵進見黃安撫謝賞。出其不意。執黃家鼐、黃嘉模、吳參將并隨從二十一人。綁去葑門外。官俱斬首剖腹。親隨二人亦斬。周子靜知風先遁。得免於難。急往南京報知。極言民

心已歸順。此舉出楊監軍詭謀。幸其有先入之言耳。三十日。楊文驄拏一人立斬之。六月初一日。拏周安撫家奴一人亦斬訖。次日亦斬三人。總云奸細。自二十九日戮黃安撫等五人後。人懷憂懼。謂激怒北兵。必有玉石不分之禍。買舟避鄉僻。□□如驚。若使楊君果爲國倡義。以圖興復。誰曰不宜。究竟一萎瑣無能。假公濟私之輩。意在垂涎庫藏。再初二日爲士民所迫。午前進坐北察院。隨至府庠謁先聖。遍請各紳於明倫堂會晤。共議守城計。長洲李公亦於是日復蒞本縣。似乎布置略爲有緒。

初三日。聞北兵已至無錫。遂發府庫銀分給兵丁。自取萬餘金。初四日黎明。出葑門登舟。率兵遁去。人心瓦解。凡各兵屯兵近郊者。皆散歸。六門不閉。是日微雨。午間。北兵驟至。由閶門入。人各二馬。魚貫陸續而行。從婁門出。轉往葑門。欲追楊文驄也。追至水濱。楊君不知所之。其隨從兵舟。被北兵以火器擊壞幾隻。□簪亦燒燬一二。北兵大營紮於社壇。主帥駐白雲菴。欲諸鄉紳出。與共議地方事。隨處懸

示慰諭。初五日。新太守王鏌中州人也。上午入城蒞任。乃剃髮戴臊子帽。以箭衣爲公服。

小民共往縉紳家。促其出見。以紓蘇城之禍。大都匿不肯出。衆情憤恨。打毀徐九一、李子木、蔣韜仲等各家器物。初六日。城內外百姓。相約每圖爲首一人。手執黃旗。一面上寫某圖民投順大清國。餘人各執線香。爭往大營納款。庠友亦投謁往見。鄉紳沈去疑爲先。午後。各官入城。都督土國寶坐北察院。諸友進見。溫言相慰。云吳民旣歸順。自然雞犬不驚。各安生業。吳庠顏子發。特懇其禁約兵丁之橫暴於鄉者。土公亦許出令禁止。云卽日撤兵。無苦也。初七日。土公令各圖捱查鄉紳舉貢庠友之在家及不在者。崑山庠生朱應鯤。因獻本縣冊。遂令爲長洲縣令。吳縣令薛某。以縣丞陞任之。初八日。發兵往杭州。行者撞於道。皆騎卒也。申青門未出見。撥兵三十名坐守其家。大費酒食。董君弼家尤被騷擾。初九日。水兵三千道經吳門。是日午後大雨。至初十日午間止。兵船冒雨而行。時當插蒔。乃甘霖也。但

戎馬在郊。邨農多避匿不蒔。卽已蒔。亦被馬啖。或刈爲芻。負郭之田。戕害甚矣。申家口兵忽有令箭撤去。因總督刑部侍郎李延齡幕下。有任兵部職方司者。原籍山東。乃青門舊治下耳。李土二公雖督撫總鎮之尊。略無章服。同一剃髮垂辮。出則加鉞帽於首。頂撒纓一叢。身穿箭衣。色從其便。卽坐堂理事。每皆禿首。且環坐一堂者。恆有六七人。開府正衙。尊卑並列。乍見之。殊覺可訝。李公出示。延見舉貢庠生。各府州縣因多缺官。意便宜欲選任。十三日。于孝廉中選知府。卽推三四人。于庠生中選留吳翀漢、馮嘉等八人。尋授知推之職。會申青門微言以解。云諸生年少之未經事。恐不勝繁劇。乃不果授。孝廉貢生十四日有續到者。皆公服立待。各唱名過堂。點畢而出。庠生凡投謁者。或公服。或儒巾便服。或方巾青衣。概不行拜揖禮。但呼名至前。約十餘人。李公卽云請回。又欲授諸生以縣丞。皆不就而罷。圖中稽察鄉紳大戶之家。先之以現總。繼以衛弁。最後上官乘馬親查。有不在家者。卽加記識。故凡內眷之避於鄉者。次第接回。室家相聚者居半矣。吳地尺寸皆

利藪。曾無曠土。可容郡馬牧放。北兵人挾二馬。縱之於野。自應傷稼。每日告於上。由是撫鎮兩臺。令收兵馬入營。遂有納徵青草之舉。二十二三日。初議長洲田五十畝。每日納草一擔。吳縣田二十畝。山蕩田十畝。每日納草一擔。謂營中每日需馬草一萬五千擔。兩縣均派。各該七千五百擔。長洲田多。故五十畝爲率。吳邑田少。故二十畝爲率。若此。則吳縣有田百畝之家。日供五擔。百便五擔。不但力不供。亦何處有許多青草。羣情大駭。紳衿士民連日具呈各臺。苦懇。舌敝力殫。至二十七日。方定兩縣各田百畝。每日納草百斤。官戶交軍門收。民戶送盤門外大營收。時已移社壇營。改屯山川壇內。路遙天暑。兵卒驕橫。交納草猶不勝苦也。

二十九日。忽傳北來有詔十八款。內一款驅除僧道。凡僧尼道士。俱令還俗。寺觀菴院。封閉入官。承天雙塔寺。寺富。僧恐甚。當晚將酒減價發賣。僧有具呈軍門者。李公立發告示。從古三教並重。斷無遺逐僧道之理。隨訪拏誤傳詔旨者。得玄妙觀李道士。發捕廳審究。署總捕王同知名志古。本貫崑山。郡中大參劉王受外孫。

也。研李道士乃得白抄傳。非其毀造。責四十板。解撫院。李公亦不深罪。得免死也。閏六月初一日。斬盜官馬賊一人于尙書巷口。其妻給賞兵丁。

初二日。士民相訂同具呈本府及總督軍門。請減吳郡重賦。因庠友到府者僅十餘人。不成公舉。太尊亦過午不出堂。未及進呈。來日進訖。

初三日。斬三人於大街。云係奸細。是日有固山大人自北來蘇。駐兵備署中。隨從兵多。初四日。大雨竟日。兵丁避雨。共入民家。掠取衣食。奸淫婦女二。有投水不受污者。固山亦卽移去。

初七日。李公請見諸庠友。因人言籍籍。疑其起於士林。故面相慰諭。大抵傳聞欲剃髮之故。李公向已告示張掛。謂決不以剃頭一事。拂爾之意。初九日。周安撫遍示決不剃頭。豈知號令不信。自初六日起。先將闔齊婁葑水門封閉。僅開南城水門。收納馬草。至初十日。城外兵丁俱收屯城中。十一日。水陸各門俱閉。清晨。將北兵來黃紙刊印榜文。粘貼通衢。不論紳衿氓隸。俱欲剃髮。違者軍法治之。先是吳

江庠生吳鑑。具條陳於縣。與縣公語不合。推仆公案。縣解軍門繫之獄。是日綁出。斬之以威衆。此友大罵。立而斬首。嚴催官民刈髮。本府太尊王。前六月十五日。方束髮冠帶。同新任理刑徐樹藩。恭謁文廟。徐卽郡中著姓。先曾應天通判者。今補節推。隨署太倉州事。奈法行自近。府縣官率先剃頭。不半日間。城中倏然改觀矣。鄉紳有翰林陞禮部侍郎徐。投水自盡。心憤激不忍變也。十二日。李公遍請紳衿入見。想欲驗其剃髮與否耳。是日。轅門外剝殺不剃頭者一人。楓橋聚衆抗拒剃頭。差兵一二百騎往拏。便成瓦解。亦俱就髡。然人多憤憤不平。召亂之由。未必非此。

十三日。昧爽。忽聞礮聲。六門外火起。城門頓開。有民兵先從葑門入。各門陸續俱進。斬木揭竿。間有執戈矛被甲冑者。皆以白裹頭。大都用布。額加紅點。手持一二大明旗號。聲言副總兵吳聖階統蔣陳朱魯諸將入城。精兵雲集矣。城中民於街衢俱將巨石及木器堆垛。宜意阻礙北兵馬足。凡巷口俱聚街沿石壘塞。僅留小

門。容一人俯首出入。人心惶惶。各懷疑懼。民兵先於閶門外擊毀兵舟千隻。舟中數千人俱斃。聞有名貴要人在焉。因困於中流。無所施其技故也。縱火燒斷閶門吊橋。延及月城內口俱盡。又放火燒府縣署。及都察院。北察院監兌署。俱成煨燼。予見民兵雖多。皆市井鄉村烏合。既不習戰陣。又漫無統領。固決其無能爲。喧鬧至晚。漸散去矣。方其清晨入城時。卽呼居民令具飯接濟。有閉戶者。輒加箠擊罵詈。闔門內一路民家。多設簞食壺漿於道旁。供其飲啖。良亦不得已而然。徐究其兵端。祇緣陳湖聚衆不盡發。亦兵往征。被傷數十人。亦捉獲六七亂民繫獄。是日。陳湖人實倡此舉。率衆破獄。劫繫囚以去。此其本謀。乃四方聞風應之。總一時乘興妄動。旅而進亦旅而退。非有攻圍戰守之能。卽李土二公及各官。亦俱團聚府庠瑞光寺前。屯兵自衛。未見有出奇制勝。電擊颺馳之快舉也。是夕。街坊敲梆放礮。吶喊之聲相聞。大約皆無識無賴所爲。守分良民。知己觸上怒。恐不免誅鋤。倉猝挈家遠遁。向來李公有令。不許鄉紳士庶攜妻子貨貨出城。違者論斬。此際六

門洞開。無復禁令。出者踵相接矣。

十四日天曉。既無重兵壓境。城中兆姓之不能遷者。周子靜授意。令羣聚往軍門懇求。辨其倡亂。非屬城市小民。李公始雖盛怒。後稍霽顏。是日辰刻。仍有執大明義師旗者二三千人。從吳趨坊南上。至飲馬橋。遇北兵數騎衝下。便爾奔散。僅傷一失隊北兵於中途。未至日午。相率退出閫門去矣。晚間。李土二公各出示安民。云。察知此舉。係楊監軍餘孽勾連海寇爲祟。大兵到日。追剿城中良民。不必驚恐。但須協力守城。緝拏奸細耳。南北二童子門相繼熟。遂令將水城門俱堅閉下閘。夜間民夫上城防守。十五日。撥兵往葑門出。其在途橫暴。有所知者一事。蘇人王惠伯現爲軍門標下職官。兵丁擁入其家。執家屬一人。斬爲三段。擄其婦女數口。惠伯亦被縛。將加之刃。財物細軟掠盡。適軍門正差官來喚王君領兵。兵聞令。乃釋縛。并還其婦女。然貲賄烏有矣。惠伯急徙居避去。總云城中東南隅。其被搶掠取殺之害殊多。非如西北之無擾。一城之內。便隔天淵。眞有幸有不幸。是曉。并將

各城門壘石塞。以便守禦。至暮。民家各懸燈於門。擊柝支更。自此夕始。十六日。各門外窺伺出沒之衆未已。且怒城中人拒守。交口辱罵。闔門外有堆乾柴於木棧。欲燒水門者。城上有山西客商善射者二三十人。一面發矢射之。一面縋人下城殺去。傷彼數人。方退。晚間發兵幾百。出葑門剿亂。行至黃石橋。得勝而還。是夜黃昏。月蝕至九分。更餘復明。深夜提兵。獲放火二人斬訖。傳聞有城中打糧之說。衆懼受害。議令每圖各具酒二罍。猪羊雞鵝乾麪等物。白米一石。皆溫飽之家湊出。十七日。投揭送爲供應。亦不得已之計也。城外仍聚衆窺瞰。官民俱登城防禦。王太尊駐闔門。王二府駐齊門。張二府婁。是日。婁關水陸城門。幾爲亂民所燬。胥門鼓樓。半燬於火。齊門鼓樓隊板。旋即修訖。十八日。南京兵到於闔門外。約有幾千。彼窺伺之衆已潛跡。無敢抗。敵兵追躡搜索。亦多斬獲。遂縱火南北兩濠。掠取財貨衣飾婦女無算。凡亂民倏聚倏散。詭詐不測。未必撓鋒刃。其所殺者。多屬戀家未去之民。或各行商賈之顧惜貨物者。身被屠。物被掠。屋被焚。深可憫也。是日清

晨。城內止有數十騎出閭門。午間。二百餘騎出齊門撲剿。時。婁門外有衆突入城搶掠。幾及華陽橋。正欲縱火。見發兵到。乃遁去。王太尊有示安民。云爲輸口事。憐念城中俱像良民。大兵雖到。秋毫無犯。爾等不必驚。懸牌通衢。并隨處粘帖。李公適巡城。守城民復跪懇寬宥。李公慰之云。天熱不必跪。起來起來。前日你們放火欲燒死我。我又燒不死。如今却來幫我。這不是幫我。欲保全妻兒老小耳。我已分付過不殺城內之百姓了。可放心也。北里二圖執索米於鄉紳爲首者一人。綽號張松鼠。土公立刻梟示。圖棍王紹先。兼攬三四圖事。名冊未全備。又藏不剃頭親黨在家。被人舉首。又執楊家院子巷曰積蠹梅家兄弟三人。遂將王紹先梅四斬首外。兩人各執四十板釋去。

前六月終起。至閏六月初旬。徵收馬料青草甚嚴急。民爭先上納。若一日不可缺者。乃自十一日閉城門。十三日民變以後。納草之令遂廢格。城外每日煙燄不絕。兵轉至婁齊各門外殺人掠財。搶占婦女。慘不口言。知此枝兵非爲蘇郡而來。原

係道經吳地者。城中因借以爲聲援。彼旣飽所欲。遂東去矣。

二十日。有童執戈登城守陴者。誤闖入營內。綁去欲斬。苦求得免。遂斷去右手。指緣將卒屯紮闔門鼓樓。彼謂此處爲營內。有誤入者。所斬不一矣。

二十一日。兵丁出闔門打糧。守城民之無賴者隨之往。多獲銅錫器衣服等物。間有歸而復往。所取過望者。齊門外各棧房貯米殊多。是日清晨。官給小粟。令民出城搬取。兵丁守門稽察。隨所取多寡。半留入官。半以與若人。又脚夫運米一石入城門。給與脚夫一斗。城下擁擠喧鬧。兵丁鞭笞交下。人莫敢忤視。諺云莫作亂離人。信斯言也。從十三日始。城中家家閉戶。途少行人。其往來於途者。率皆手持鎗棍。爲守城之伍。間有士流及富民。亦皆禿首。

二十二日。大日暉橋尙有亂民嘯聚。城中出兵抄其後。斬獲及墮水死者幾百人。何彼亡命者之不揣。自速其斃耶。

二十三日。令民夫往上塘棧房取米。強有力者多得之。兼取他貨物錢帛。虛往實

歸者絡繹在途。文弱之人。瞪目相視。莫敢並驅爭獲也。

二十四日。縱衙役出閭門取米及遺物。民夫亦得隨往。至山塘棧。有以布裹頭之輩。潛伏在彼。傷城民數人。亂民亦被殺四人。執二人入城。處斬訖。土公原任總鎮都督。至是陞爲開府。出示稱都察院將代李公之任矣。

是日。余偶往齊門。望見鼓樓南簷下張帷帳二頂。有兩美人。一披髮垂肩。女子共坐臥其間。兵丁時揭帷言笑。自取其樂。不知被擄婦其中心慘戚何如也。城內小民。候令發票出城取米者。羣集以待。土公適逗留婁門。逮晚不至齊門。王總捕代爲發票。本欲挨圖給與。但人衆爭先。何能一一致詢。大約强者得之耳。吳江因殺縣令。不服剃髮。發兵往屠。是夜兵入城。城中遷者已過半。兵丁各以取財爲急。人得逃匿。被屠僅數十人。復往同里。殺戮無算。

二十五日。復有兵到。并取米者俱不放出。此兵亦屬過往者。午間。亂民放火燒山塘棧。土公於閭門城上點民夫百名往救。回時各攜所取之物。令均配作百堆。土

公令每人取一推以爲賞。

二十六日。吳縣知縣汪燭南到任。湖廣麻城人也。薛令十三日戕於亂民之手。至是新補焉。城中民具呈土公。求護家眷入城。許給令旗以往。齊門外有父老自縛拜懇土官。亦欲招安。乃樹旗齊門。許其自新。是夕。楓橋山塘下塘及婁門外。又數處放火。狂逞之衆。猶不悔禍。豈殺運尙未除耶。

二十七日。齊門已容出城。但盤詰謹嚴。城中民欲往鄉領家眷者。須具一揭及四保結。稟明土公。又製黃旗一面。上寫都察院給付其圖居民。土公親加僉押爲照。途中便無阻礙。其有竟自鄉間來者。有婦女偕行。方容入城。慮單身行人或是奸細也。是日。領旗下鄉者如市。

二十八日。未曾啟門放

縣有脫誤

向來兵丁擄獲婦女無限。戕害及病死者多矣。至是

官令給還完聚。許親屬領去。約有二百餘口。李公是日將奸淫兵丁一人穿箭遊示。上臺旣加禁戢。將來或知顧忌耳。